


BAKURUBASANNI

(nimore 12 songs)

Mali kono = Dōrōme 300

Afiriki kono = Dōrōme 600

Jamana wəre = Dōrōme 1000



Kunnafonisəben bota kalo o kalo. BP: 24 Telefoni : 21-21-04. Bozola Bamako-Mali. San 29nan boko 357nan A song : dōrōme 15

Okutoburukalo san 2001

Minisirijemogo ni kunnafonidilaw kumana Mali bilama kan.

San 2000, fewuruyekalotile 15, jamana kuntigi Alifa Umaru Konare ye goferenaman konew latem Mande Sidibe ma. Jamanaden dōw y'a jira ko Mande hine b'u la, k'a sababu ke Mali tun be cogo min na o waati.

O waati y'a soro soro ko donne don bogo la, yeretajininaw wulien don fan bee fe; jamana ni dijne waribontigw te ka kan kelenfo; kuma te lakoliko geleyaw ma. Baaraw tun man nogon Mande Sidibe bolo fan si fe.

Kalo mugan temenen kofe, hali ni geleyaw ma ban, caman koni kera baarawla. Soro ko ma sabati k'a sababu ke jamana kókan geleyaw ye; lakoliko ma jenabo; wa san 2002 woteko labenw fana be senna. Nka, a kera cogo o cogo Mali bilama ka fisa ni kunun ye. Fokaben kera jamanaden ni nogon ce, sanko jamana lamini minisiriso ni maradenw. Jamana fana ni dijne waribontigw be ka ben doonin-doonin. Soro ko sabatili siraw kun be ka be doonin-doonin.

A te se ka fo ko Mande Sidibe kelen no ye Malika jetaa baarawaye; nka nkalon te min na, Mande baarakcogo ye yeləmaba don kow la; sanko a katiyalanfo. O kadara kono a y'a jira bulonba mogow la ko goferenaman be bee lamən, k'a seko ke bee kelen-kelen, ye ko nka jamana ka sini soro te don bogo la bi here dōron kama.

Mande Sidibe tun ma deli ka kuma arajo ni jabaranin na. Nka kosa in na, a kumana Mali bilama kan jabaranin na. Arajojemogo Sidiki Konate ni «AMAPU» jemogo Gawusu Darabo ani kenyereye kunnafonisəben «Erepibiliken» baarakela do Adamu Camu jera ka Mande Sidibe nininka.

A ka kumaw damine na, Mande Sidibe y'a jira ko n'i y'a ye nin geleyaw ye jamana soro, Mali ka soro ko bee ju ye seni n'a nogonnaw de ye, seba fana te jamana ciyakedabaw ye i n'a fo iziniw n'u nogonnaw. O kofe fanga bəre te jamana ka fen jagokow la; wa tuma dōw la sanjikodese fana be jamana



Mande Sidibe

soro.

Mande Sidibe nininkalen ko mun na jamana ka san 2002 nafolodeseta sera fosefawarimiliyari 70ma, a k'o sababu bora koɔrikomusakawla. Nafolo donna san 2002 wote labenw fana na; musakaw donna jamana yeelenko ciyakeda fana dafe.

Mande Sidibe ko jamana ye sefawari miliyari mugan min soro ka bo kókan, n'o deme bëna fara san 2002 nafolo kan, o bëna ke sababu ye ka kalanko, kenyako ani jiko sabati jamana kono. Min ye koɔriko geleyaw ye, minisirijemogo y'a jira ko goferenaman ka lajini ye ka danaya sabati faamaw ni koɔrisenew ce. O kadara kono bënkansében do dilanna layidukan 11 be min kono. Goferenaman y'a layiduka ko koɔri kilo kelen be san sefawari dōrōme binaani (40). Nk'o t'a bali semudete k'a sen bo taransiporikow ni këfenkow la, k'olu bila kenyereyw ka bolo kan.

Min ye ciyakedabaw bilali ye kenyereyw kabolokan, Mande Sidibe y'a jira k'o kow be senna; i n'a fo yeelenko ciyakeda, «GSM» n'o ye negejuruko ye, ani koɔrituluboyoro ciyakeda, n'o ye «UKOMA» ye. U ni ciyakeda wərew bëna je ka pankurunkow ni negesirakow jenabo

nogonfe. Nka, u ka lajini ye fen min ye, jamana'denw yere k'u sendon ciyakeda ninnu labaariali la.

Mande Sidibe da sera fariniboyoro wusuruko fana ma, k'o dabora iziniw demeni kaman. A kotakisi laban ka kan ka bo yen pewu.

An be don min na i ko bi, baarada min lakodonen don ni farini dilanni ye, o ka dilannente laboli ke. Goferenaman te se k'a sigi k'o ko laje ten, sabu sunkalo ni san 2002 ntolatanba be sensen na ka na; nbuuru caman be dun Olu senfe. Minisirijemogo ko fila te min na, ale be jama de fan fe.

Min ye basigi ye jamana kono, Mande Sidibe k'o n'o te, fosi te se ka jenabo jamana kono. Okama sigikafow labenna jamana fan bee fe. O konew wolola bënkant do la min te ka waleya jamana kono.

Bënkant in koro te ko yeretajininaw tu taw nini. U be lamən, wa goferenaman b'a seko k'u ye; nka, a te dabo jamana sini here donni kama bogo la.

Min ye lakoliko geleyaw ye, Mande Sidibe y'a jira ko baara caman kera. Nka san tan poroze min be senna lakoliko siratige la n'o ye «PRODEC» ye, o bëna baara tow sabati. Minisirijemogo y'a jira ko wale min be lakoliko geleya ban, o te dower ye, fo lakolidenw ka kalanké, lakolikaramogow k'u ka baara ke; kojenabolaw fana k'u ka kow jenabo; goferenaman yere k'a ka baara ke. Min ye politikiko siraw ye, Mande Sidibe ka fo la, sigikafò minnu kera, olu kera sababu ye ka ko caman nogoya. Ben sabatira mogow ni nogon ce. A y'a jira ko jamanaden ka kan ka ko bee ke, walasa san 2002 wote ka ke bennijelenya nilaadiriya kono. Osiratige la, segin bëna ke togosébenw kan, walasa minnu togow ma se ka sëben, olu togow ka sëben.

U y'a nininka ko yala a yere n'a kanbo peresidanya nöfe wa; a y'a jira k'o nininkali jaabiyo te kene in ye.

Salimu Togola
Badama Dukure.

Samataségew degekaramogō Oromano MATE taara jiwoyo fε

Hakilijigin na, san 2000, zuluyekalo Kibaru boko 342 nan kōnō, «KUPUDIMONDI» kuwabala, Libimintatelen te Afiriki balontanna janaw fε, olu nana Mali sen bo dijne ntolatanna janaw ka kubben na Bamako.

O ntolatan senfε, a kōlosira ko degekaramogōko bε Mali samataségewla, bawo mōgō faamuyalenw ntolatanko la, olu ka jate la, samataségew degebaga n'o tun ye faransika Kirisiciyan SARAMAÑA ye, u k'o noba bε samataségewcili la libikaw fε. Okoné labanna ni Kirisiciyan SARAMAÑA boloboliye aka «anterenériya» baara la Mali la.

Mali ntolatankow nənabo jekulu «FMF» kuntigi Amadu JAKITE nana malidenwladonniyā kononabilla sorola samataségew degekaramogō koro kirisiciyan SARAMAÑA la, n'o ye Itali jamanaden dō ye, min togó ko Oromano MATE.

Bolono bilala berikanseben min na Oromano ni «FMF» ce, o kuntaala tun ye san fila ye, min tun daminena san 2000, utikalo tile 30.

Kunnafonidi sira kan, Amadu Jakite ko farajela degekaramogō 9 bεe detun bε SARAMAÑA joyorō nōfε, faransika caman yere tun be minnu cema.

Akonkan'iy'aye «FMF» ye Oromano MATE sugandi, osababubora yelema donni na an ka ntolatan feerew la ni jamana wεre mōgō faamuyalenw ye, i'n'a fo Itali janaw, minnu dōnnen don dijne kōnō ni balonko faamuyali ye. Osifileli de kera Oromano MATE sugandili ye «FMF» fε. Nin y'a siñe folo ye Mali k'i nesin Itali jamana ma ntolatanko labenni sira kan.

Amadu Jakite y'a jira ko Mali samataségew degekaramogō kura Oromano MATE te mōgō dogolen ye dijne kōnō balontanko la. A y'a baara ke a yere ka jamanā kōnō cogo min

na, a y'a ke tenjamana kōkan. Nin y'a san 26 ye, a m'i sigi k'a bolo fila d'a sen kan. A y'o waati bεe ke «anterenériya» la, n'oyebalontannaw degeli y'u ka baara la.

Hakilijigin na, Mali sōrōko ni hadamadenya ni sekoni dōnko jekulu «CESC» ye laje balalen dō ke, san 2000, setanburukalo tile 4, min senfε u y'u ka jore ni hami da kene kan san 2002 «KUPUDAFIRIKI» labenni kadara kōnō, kērenkerennēya la u y'u sinsin samataségew degelikaramogōko kan. A waati, Mali farikolojenajekow minisiri, n'o tun ye Adama KONE ye, o y'a jira kumañogonya senfε, ko KUPUDAFIRIKI hukumu kōnō hali ni Mali ye dijne sira numanw bεe dilan, ka dijne farikolojenajeyorō numanw bεe jo, ka dijne pankurunjiginkene numanw bεe laben ni Mali samataségew ma laben konuman, o bεe ye fu de y'an bolo.

O yorō la, Mali sōrōko ni hadamadenyako ni seko ni dōnko jekulu «CESC» ye Mali ntolatankow nənabo jekulu «FMF» ka ciden yamaroyalen koloneli Isa Jalo nininka, a ka pereperelatige d'u ma feere tigelenw kan samataségew labenni siratige la, bawo malidenw bεe jorelen don n'an ka «ekipu» samataségew ye san 2002 KUPUDAFIRIKI la.

Koloneli Isa da sera Oromano MATE sugandili ma, o kō degekaramogō in ye feere min boloda ani ka dabali min tige samataségew degeli kama, a y'a jira k'o bε damine san 2000, setanburukalo la fo ka taa se san 2001 desanburukalo ma. Akolabenni ni degeli caman b'o la Mali kōnō an'a kōkan, ka nesin samataségew ma. Koloneli Isa Jalo ko nafolokasabimin bēna don Oromano MATE ka feere tigelenw waleyali dafε, o bε se sefawari miliyari 1 ni miliyoni 300 ma.



Oromano MATE

Tiñe-tiñe yere la, gerende foyi ma sigi Oromano MATE kan a ka baara la. A bolo labilala, ka nōgoya suguya bεe dō k'a ye ani k'a se bεe d'a ma samataségew labenni na san 2002 KUPUDAFIRIKI kama.

Nka, san 2001, setanburukalo tile 26, wuladanin fε, Oromano MATE ye file fiyε ko o don «antereniman» banna. Nka sanni a nabalontannaw k'ukodon nōgon na, a y'u dalaje ntolatankene kerefe, k'u nininka, k'u ma mun fāamu bi degelicogoya la. Maliden 23 minnu tun b'a kerefe, n'u si te kōkan jamana wεrew ekipu la, u bεe bε Mali kōnōna ekipu dō de la, o mōgō 23 sim'i nēkomi ka bēn n'u degekaramogō Oromano MATE ka nininkaliye; sanko k'a jaabi. O kō, a y'i nesin a demebaga Saja SISE ma, u ka samataségew ka faransitaa laje nōgonfe, u bēna dō far'u ka dōnniya kan yorō min na. Saja k'a ma, ko fen bεe labennen don o kadara kōnō: Samateségew ka kan ka teriya balontanko fila ke, u jiginyorōko labenna k'a ban, wa an ka


ntolacila minnu bē Faransi jamana balontantōn na, o tōnw nēmōgōw ye layidu d'an ma, k'u b'u labila an ye o waatikōn, walasa u bēs ka se ka fara nōgon kan.

Om'abo, Saja SISEyeretaara Faransi Mali ntolatankow nēnabō jekulu «FMF» ka ciden nōfē, walasa ka t'i tēgē da fēn fōlen ninnu kisē kan. San 2001, sētanburukalo tile 29, samatasēgew ye Pari sira mine, n'o ye Faransi faaba ye. Nka degekaramōgo ni Mali ekipu balontanna minnu bōra yan, olu tun ye mōgo 16 ye. Olu tun ka kan ka dafa n'an ka tungafē ḥanaw ye, walasa an ka se ka badenya balontanko fila kē ni Turu ni Gēngan duguw ye.

U selen Faransi, Oramano MATE ladōnniara ko maliden minnu bē Faransi ekipuw la, k'a tēna se k'olu sōrō a ka kunben bolodalen ninnu kama.

San 2001, okutōburukalo tile 2, samatasēgew y'u ka kunben fōlōkēni Turu balontannaw ye, olu minnu jatelen tē Faransi ekipuw yēre fē, bawo ḥanaw tē. O n'a taa bēs, Mali ma se ka fosi k'olu fē ni filaninbin tē : bi 1 ni bi 1. Okutōburukalo tile 5, samatasēgew ni Gēngan ḥana mankanweye nōgon sōrōn'olu ka ekipu bē Faransi ḥanaw cēmance la. Gēngan ye Mali dasi ni bi 6 ni o ye. Kabini malidenw y'o jaabi mēn, dusukasi ni jiranjiran ni kōnorofili ye «FMF» nēmōgōw ni fasodenw bēs sōrō. U seginnen Bamako, u nana ko bēs sōrō u nē fō hēre : kunnafonidisebēnw ni arajosow ni dugumōgōw ye lajaba suguya bēs do d'ukan, k'a masōrō, utaar'anlamaloya Faransi. Nafolo fu bōra ka taa minnu nōfē, olu si ma ye ntolacikēne kan, k'a sōrō an ka tungafē ḥana ninnu si tun tē fēn na, bawo KUPUDIMONDI kunbenw tun bē ka kē a waati Erōpu jamanaw kōnō.

Kunnafonidilaw kēlen k'a nininka, Oramano MATE ma se ka foyi sōrō



Hanri KASIPERIZAKI

k'a fō k'an kan'an yēre negēn, bawo ale ni ekipu min bōra Bamako yan ka taa Faransi, a t'olu ni Gēngan ce. U bē se ntolaci la ni Mali samatasēgew ye cogoya sugu bēs la. A ko k'an jigi dalen don an ka tungafē ḥana minnu kan, ale bē k'olu de makōn, walasa a ka se ka ekipu nēnama dō sigi sen kan sanni san 2002 KUPUDAFIRIKI ka damine.

Nka Oramano MATE tun tē min kalama, nin faransitaa de bēna kē sababu ye k'a bolo bō a ka degekaramōgoya baara la Mali kōnō. Mali ntolatankow nēnabō jekulu ye tōnsigiba dō kē, k'u hakili jagabō degekaramōgōko kan, min bēna se ka Oramano MATE nōnabilanin waati kunkunrun kōnō.

A duurula jamana seleke naani bēs la ko fura kōni tē Italika Oramano MATE labilali la, min sēmentiyara «FMF» ka arabadon, san 2001, okutōburukalo tile 10 tōnsigi balalensēfē. U ye tile kelen mumē de kē nōgōnye in na, nka a ma nē min kō, a kēr'o ye, bawo o su kelen Mali ntolatankow nēnabō jekulu «FMF» ye Oramano MATE fo, k'a walenumandon, o kō k'a labila, k'a

bolo bō a ka baara la, n'o tun ye samatasēgew degeli ye. O yōronin kelen, «FMF» kuntigi Amadu JAKITE ye malidenw bēs ladōnniya ko degekaramōgo kura min bilala Oramano MATE nōna, k'o ye Hanri KASIPERIZAKI ye, n'o ye Polonika ye, min ye yamaruyasēben sōrō k'a siya yēlema k'a ke Faransi yērewoloden ye.

«FMF» yēre ka foli la, n'i y'a ye u ye Hanri KASIPERIZAKI ta, o kera kun damado de kama. A fōlō Hanri KASIPERIZAKI tun ye balontanna lakodōnnenba ye, k'a sōrō an ye Oramano MATE ta, Itali ntolatanko kunpan dōrōn de kama. U y'a jira k'an tun b'a fē k'a lajē sekō ni dōnko min tun b'a la, nka kow tīneyōrō bōra yōrō min na, Oramano MATE ka waati in y'a sōrō Mali samatasēgew sen bōra Afiriki balontanbaw bēs la, minnu tun bē se k'a joyōrō n'a sekō n'a dōnko jir'an na samatasēgew labenni na. Mōgōw bēs sōn'nā ma ko ḥanaya numan tun bē Itali kamalen in na, min tun dalen don a yēre la. Mindigira tungafē maliden balontanna ḥanaw fana na, u y'a kōlōsi k'olu tē ka wele fosi la ni balontan nafantanw tē. Malidenw bē ka jateminēw kē k'a ye ko Afiriki ntolatankow nēnabō jekulu «KAFU» ye yamaruya di Mali ma k'a bansan 2002 KUPUDAFIRIKI tanniko la, k'a sōrō ekipu nēnama yēre tē jamana bolo, min b'an joyōrō fa, waati dun sera. Mōgōw bē ka nōgon nininka fan bēs ko degekaramōgo ni balontanko nēmōgō tōw bē mun daka-sunōgōla, k'a sōrō KUPUDAFIRIKI tē tēmē kalo 3 ni kalo 4 kan.

Kuma lasurunya la, Oramano MATE n'a taacogo file ka bō samatasēgew ka «antereneriya» la.

Samatasēgew ka degekaramōgōkura ye jōn ye ?

A tōgō ko Hanri KASIPERIZAKI. A bangera san 1946, zuluyekalo tile 10 Zabiza n'o ye Poloni jamana dugu do ye. A ye ntolatan damine a ka jamana

KUPUDAFIRIKI 2002

faaba Warisowi ton do fe n'o tøgo ko Legiya, o ko ka yelema Sitali MILELEKI ton na ka san 10 ke yen. San 1976, a nogon balontanna tun te Poloni jamana kono. Poloni ekipu nasonali cemance ntolacila numan do tun don. A ye san 1974 KUPUDIMONDI tan Alimani. San 1978 KUPUDIMONDI bannen ko, Hanri KASIPERIZAKI ye degekaramogoya kunkorotaseben soro, o ko ka taa Faransi. Yen, a donna Mezi dugu ekipu la fo ka n'a sen bo balontan na. Pewu.

Hanri KASIPERIZAKI ye Faransi togola kupu yalon ni Mezi ye san 1984. San 1990, a yijja ka Arasiñi de Pari lase Faransi togola kupu finali la, n'o y'a janamine janaw ka kene ye. A ye Monpeliye lase yoro jan KUPUDEROPUjanjola, ka Senteceni ni Sitarasiburu layeien Faransi ekipu janaw fe. San 1991, Faransi y'a bila degekaramogow bee ten kan, k'o jala d'a ma.

Hanri KASIPERIZAKI n'a tøgo n'a mankutu numanw de wulila ola sa, k'i kunda Afiriki kan san 1993. A y'a damine ni Kodiware ye. A ye Kodiware samabaw ka degekaramogoya ke san 1994 KUPUDAFIRIKI la fo ka n'olu surunya finali la, bawo Nizeriya ye Kodiware ci o san noyi bow doron de la, minnu be da ekipu ni nogon ce, n'u desera nogon na. U ye Mali samatasegew ci o san kelen kupu la, ka ke Janan sabanan ye.

Hanri KASIPERIZAKI bora Kodiware ka Tinizi sira min. San 1996 KUPUDAFIRIKI min tanna Afiriki - Di - Sidi jamana kono, KASIPERIZAKI yijja ka Tinizi jamana lase o finali la. Nka dusukasi min bena Hanri KASIPERIZAKI soro Tinizi degekaramogoya la, o kera san 1998 KUPUDIMONDI senfe min tanna Faransi. Kolonbi jamana ye Tinizikaw ci o la bi 2 ni 1, o ko Langilejamana fana k'u wolon bi 2 ni 0. O mangoya kera sababuye Hanri KASIPERIZAKI ni Tinizikaw k'u kodon nogon na, ka

nogon bila.

Hanri KASIPERIZAKI bora Tinizi ka taa Korisi, n'o ye Faransi dugu do ye. A ka waati kuntaala ma teme kalo 4 kan ye, k'a ta san 1998, zuluyekalo la kat'a bila okutoburukalo la, bawo a ma se ka yen balontannaw laben kojuman.

O kofe, a taara Emira Arabu jamana kan. A ker'olu ka ekipu do degekaramogo ye. Maroku taar'a sama ka bo yen ka n'a bila u ka antereneri Hanri MISHELI nona, o kelen k'olu dusukasi san 2000 KUPUDAFIRIKI la. A donna Maroku san 2000, maristikalo la, nk'a ma se k'olu nefa san 2002 KUPUDIMONDI

kura Hanri KASIPERIZAKI ni kunnafonidilaw ye nogon baro. A dane foli kera min ye, o ye k'a nana ben nisamatasegew ka kuben minnu ye, n'olu kera maristikalo tile 26, tøgola farikolojenajeyoro koronbonkarili kadara kono, a ye balon min y'u sen koro o y'a nisondiya, bawo ale yere tun t'a don nin nogon balontanna numanw be Mali bolo.

Hanri KASIPERIZAKI k'a y'a jeniyoro fin Afiriki jamana døw ntolacilaw labenni na, an da sera jamana minnu ma sanfe, nka nin bema ke a sije folo ye, a ka ke jamana balontannaw ka degekaramogo ye, KUPUDAFIRIKI yere labenniko bee kalifalen don



Mali Samatasegew

laben na. Olu fana ye mogowere bila a nona. Hanri KASIPERIZAKI y'i t'o la fo ka n'i yere soro Shinuwajamana kan.

N'an y'a laje ji nemajolen na, Samatasegew ka degekaramogo kura ye din yaala balontanko la fo ka na se Afiriki jamanaw ma, n'olu ye Tinizi ni Maroku ni Kodiware ye. A ye san 33 jijalen ke balontankow nemabolila. Bi, a yere si ye san 55 ye. Hanri KASIPERIZAKI yera Poloni balontan fasokunmaboken kansine 65, ka KUPUDIMONDI 2 tan n'a ka jamana ye. San 2001, okutoburukalo tile 15, samatasegew degekaramogo

jamana min na. Nin y'ale bolo bonya ni karama ye ani danaya, a ben'a seko damajira ke ka min minen fa. A ko ale ye dønniya ni hakilina minnu soro ka koro Afiriki jamana døw kono ntolatanko la, o ka kan ka ke sababu ye, k'a ka baara nogoy'a bolo Mali la. Hanri KASIPERIZAKI y'a jira jama la ko yelemaninw donna samatasegew labenni kubenw na, minnu ka kan ka ke san 2001, desanburukalo tile 5 ni san 2002, zanwiyekalo tile 10 ce, walasa tungafé ntolacila janaw bee ka se ka dalaje nogon kan, ka mog numanw latjom minnu bena Malijeyoro fa «CAN-2002» la, bawo a b'a fe bee

lajelen ka ye labenni teriya kubennw kene kan.

Ni Kupu Kabarali tanna san 2001, nowanburukalo tile 3 ni tile 17 ce, samatasegewni Kodiwaribena nōgōn soro Sikaso desanburukalo tile 5, u bēna Burukina kubenn Segu desanburukalo tile 23; samatasegew ni Gana fana bēna kuwaba ke Moti san 2002, zanwiye kalo tile fōlo, k'u kōgo da Senegali warabaw ta la Kayi, zanwiye kalo tile 4. O bēt temenēn kō, u ni Zanbi bēna cēnin tulon ke KUPUDAFIRIKI yere nēkōrō Bamako, san 2002, zanwiye kalo tile 10.

Olu kubennw ni nōgōn ce, degekaramogo ye dege kalanko fila boloda : fōlo bēna taa ke Faransi k'a damine desanburukalo tile 12 la, min senfē samatasegew ni Faransi ekipu nēnama dō bēna teriya balontan ke; filanan bēna ke teriya kubenn caman ye, minnu bēna damine, san 2001, desanburukalo tile 23. Hanri KASIPERIZAKI ye kunnafonidilaw ladonniya, k'a ye Seku JALO ta k'o k'a ka dankanye. A nininkalen o kun na, a ko Seku JALO min ye samatasegē mankanninw degekaramogo ye, a y'ota ka d'a kan, u ye nōgōn dōn Faransi, ka ntolaci ke nōgōnfē. I n'a fo bamananw b'a fo cogo min na ko mogo «nugu ka ni i dōnbaga misi bije de la», KASIPERIZAKI k'a y'o baara de ke, bawo waati foyi t'a bolo tuguni k'a be mogo wēre jini ka fara a yere kan, ka teme Seku JALO kan. A k'u ye san caman ke nōgōn kan. A y'a dōn balontanna numan ye, k'a dōn degekaramogo numan ye fana.

O kōrō ye ko Seku JALO bilala Mamadu Kulubali n'u k'a ma ko «Kulu», o nōna.

A k'an file yōrō min na, tungafé nāna hake minnu lako dōnna, k'u lasōrō, a hake ye mogo 29 ye. Mali ekipu ntolacila minnu bēna fara olu kan, o fana hake 23 ye. Olu de bēna laben, ka sugandili k'u cēma. Hanri KASIPERIZAKI k'ale te mogo bōmogo

la, ni min y'a seko h'a dōnko da kēnē kān, a b'o ta. Nka a ma min dogo, ka nogo t'a la, o ye k'a fō k'a jīgiba bē tungafé nāna kan, bawo olu labennen don kojuman ka teme sokōnō balontannaw kan. A y'a jīra k'an bē kulu min na, ko jamana t'a la bonya man kan ka da min kan ntolatanko la, bawo n'a bōra Liberiya la, Nizeriya ni Alizeri ye KUPUDAFIRIKI caman tan. O tuma, an man kan ka mogo si manamana mine, bawo balon te dōn k'a ban.

MARISIKALO TILE 26


FARIKOLOJENAJEYORO KORONBONKARILI KUNBENW

Jumadon, san 2001, okutoburukalo tile 12, marisikalo tile 26 tōgōla farikolojēnajeyorō koronbonkarila jamana 3 fē, n'o ye Afiriki - Di - Sidi ni

min ye nin koronbonkariyōrō la, mogo si t'a boyōrō dōn. Samatasegew ka koronbonkarili kubenn filanan kera ni Marōku warabaw ye, karidon, san 2001, okutoburukalo tile 14.

Samatasegew fōlōla ka Marōku celu yaara ni Wensan DUKANCE ka balonjugudōwalonniye, sanga 8nan na. Sanga 3 dōron, o kōfē, Marōku y'o bi bo, k'a ke 1 ni 1 ye. Samatasegew dusu bōra. Basala ni Mamadu Bagayoko ye Marōkukaw godon, k'u lagirin, Sanga 5 temenēn Marōku ka bi kōfē, Basala ye balon numan dōbila Bagayoko kunkolo kan, a ye min dasi Marōku jōlakanabaga Idirisi ka celu kōno.

Marōku warabaw ye kinni ke, ka wagasili ke ka dēse. A ma nē, ntola jaratigēbaga y'u ka mogo kelen labo a



Balontanyōrō falen i ko dakōnōjin

Marōku ni Mali yere ye. Kubenn fōlo la Basala TURE n'a jēnōgōnw ye Afiriki - Di - Sidi Bafana - Bafanaw mine k'u walon bi 2 ni 0. Samatasegew ka bi fōlo donna Mahamadu DISA fē, balontan kufōlō sanga 27 nan na. Bi filanan dilanna Jibirili SIDIBE fē, k'a di Alifuseni KARANBE ma sanga 83 nan na. Mogo 50.000 minnu tun kelen don ka farikolojēnajeyorō in fa i ko dakōnōjin, olu dusu sumana i ko gilasikuuru de dar'a la, bawo malidenw tun sigilen te ni nin ye.

An ka tungafé nāna nana ni dusu

ka nāniya balontanjuguya sababu la. Mali y'a ka se filanan soro, ka tila ka ten ta koronbonkarili kubenn in na. Hanri KASIPERIZAKI y'a jīra ko samatasegew y'u jeniyōrō fin, nka halisa fēn caman b'u je KUPUDAFIRIKI labenni kadara kōno, n'o ye ekipu numanba kelen sōrōlī ye, min mogo bēe bēna nōgōn faamu, walasa ankataa yōrōjan Afirikitulonba in janjo la san 2002.

**Modibo Naman Tarawele
Solomani Bobo Tunkara
Basiriki Ture**


Marabagajuguw malora dë!

San 40 temen en kô, mun bë senna bi farafinna kôno? K a denmisenniw feere!

Ni jamanaw kolatigelaw ma wuli joona; ni farafinna m'a cogodon, farafinna bëna silatunun.

Ni tijé don ko bi denmisén ye sini mogokoroba ye; ni denmisénw ye jamanaw jobagaw ye; ko den ka di ni fën bës ye; ko ni den kera sa ye, ba b'a sir'a cë la; ni nin folen bës ye tijé ye n b'a nini farafinna kolatigelaw fë, u ka feere bës siri ka denfeerek in dabila pewu.

An k'a dòn k'an marabaga kôròw, nansaraw ne b'an na dë! Nin tun ye ne ka denmissen hakili döye. Ala k'an son hakili juman na!



Burama Sidibe

Burama Sidibe
Sirakorola «CAR» la.

Maraseginso kera baara ye

Maraseginso ker'an bolo kabako ye, sabu anw ma hëre sôr'a kôno. Fën o fentun yedörôme 100 ye, olubës kera dörôme 3000 ye.

O kofe dutigi fën o fen b'a ka nisongo dafalen sara, o bë laban ka wusuru do fana sara min b'a damine dörôme 3000 la ka se dörôme 4000 ma. O si t'a la baasi ye. N'i ye nson miné i bolofén nöfë, mériw b'a fo k'i ka sefa dörôme 2000 sara, k'u b'a bila kaso la. N'ima sonoma, n'itaara sandaramuw fë yen, u b'a bila, k'olu te se ka nson balo kaso la, sabu a musakaw t'u bolo.

Pate Boli
Danbana Kita

Nögönibagajiko gelyaya

Kita marayorow ye gelyaya soro nögönibagajiko la ninan. A dun fôra ko kooriko bëna bila julaw ka bolo kan.

Bës b'a dòn ko julaw ye natabaw ye.

Yala olu ta bë nögøy'an ma wa, walima semudete ta de ? Ne Manan Keyita kônafililen don a kola.

Manan Keyita
Sitanlumu Kita

An b'a ke cogo di ?

Ne bë min fë jamana nemogow ye, u k'a laje ka feere cogo nini Ofisi malo la. Bawo n'i y'a jengen k'a laje i b'a ye ko nögö songo gelyaya, ko do farala jisongo kan; ne fë, o ye songo te malo la. N'oté nin musakaw bës be bëmalola, i b'i ta soro.

N'i y'a ye sene ka di, i ka senefenw de bë san. Hali ni «taari» kelen ye bëre 100 soro, ni songot'a la, a bë ke segen fu ye. Hali ni dugu «AWE» ye songo k'a la, «AWE» bë laban ka t'a feere min ? F'o yoro de ka nini nemogow fë ! Fôl Ofisi iziniw tun b'a san songoba la, o labanna ka dabila. Otuma an b'a ke cogo di ? Wa Ofisi senekelaw ka gelyaya jubä file nin ye.

Bayini Sakö
Balikukalankaramogó
Dogofiri Kaadokin na.

Gelyaya minnu b'an kan

Ne ye ko do jatemine Kolokani dogotoroso la, o man ni dë ! U bë banabaatow ka furaw sojé. Ni do sera ka f'o la, o bë diy'an ye.

O kofe semudete ka baara do fana man ni. U bë posoniji ke bidon kôno ko litiri kelen don, k'o feere senekelaw ma ka sôr'a te litiri kelen bo.

Kasumu Jara
Jalan Kolokani

Nin bë mogoya tijé

Nemogow ka kan ka kominko laje, n'oté kominko b'a fe ka duguw ci !

Mur na gelyaya minnu ma d'an kan fanga temenenw na, olu bëna d'an

kan-sisan. Ka senekelaw to foro kono ka sandaramaw bil'u nöfë.

A man kan cogo si la siginogonw ka lalamoya, sabu o bë na ni mogoya tijeni ye.

Lasina Sangare
Mëmi Sala Sikaso.

I b'a fo ko fanga te yen tuguni !

Ne b'a nini lakanabagaw fë, u k'u jija ka mogow deme Kita kono. Nsonw kelen don ka bës töoro; i b'a fo ko fanga t'an kunna tugun. Mogo si te siran fosi ne tugun. Fen bës be sojé. Bin bë ke mogow kan k'u faga u bolofenw nöfë. Fosi te b'a la.

Halitaratadon, marisikalo tile 13, san 2001, Kita ni Bamako ce, siraba kan, bin kera mobili fila kan ka pasasew bolofenw bës bës'u la. Ala y'an kunnadiya ni ma t'ala. Ayoro in ni Kati ka surun nögon na kosebë.

Hamadi Aturu Boli
Danbana Kita

Senekelaw lakodönni kana ke wote waati dörön ye

Ne ye fën do jatemine jamana kono, o ye kojuguba ye, k'a sababu ke san 1999 waatila, senekelaw ka kooriwar tijena jamana faamaw nëna; anw senekelaw ma faama si jöyöro y'o kila; f'a kera baarabila ye waati min na.

Nka, an bë don min na i ko bi, senekelaw lakodönni waati sera.

Don o don pariti nemogow bë senekelaw da la, k'u negen u ka don u ka politikitonw na, n'o y'u ka paritiw ye; oyefenyemin man ne. Senekelaw lakodönni man kan ka ke wote waati dörön ye.

Dirisa Togola
Bonwu Banko

Poyi : Ne siranna

Ne siranna,
Ne jorola,
Ne hamina,
Ne hamina
mun na ?

Dine kono
A kono
jumen ?

A nognjanfa,
A kono dabali,
A nognjenini,
A nognjuguya,

Mun y'a nognjanfa caya ?

Mun y'a nognabali caya ?

Mun y'a nognjenini caya ?

Mun y'a nognjuguya caya ?

An kewale :

Koro te doogo nenen fe
doogo te koro nenen fe
fa te den nenen fe
den te fa nenen fe

Yee ! Ne siranna

N badenw !

Kabiladenw !

Jamanadenw !

A' ye n deme nin ko in na !


Fabilen Jara n'a be wele ko Jo
ka bo Koyan Donbila Komi

Laadilikan

Ne bena laadilikan de fo malidenw ye. An ka fadenya ke cogoya koro la. Fadenya tun ye ni karisa ye baara ke ka fen min soro, ne fana be baara ke k'o nogn soro. Nka bi fadenya kelen don nogn janfa ni nogn njenini ye. An ka fadenya ke ni dusukun ni naniya numan ye.

O baara de b'an ka du yiriwa, k'an ka kabilia korota, ka jamana ka netaa sabati.

Fabilen Jara n'a be wele ko Jo
ka bo Koyan Donbila Komi



Fabilen Jara

Si te lakana sitigi ko

Fura saradalen be ko saba jira. O ye jumew ye ? A k'i keneya walima a k'i ka bana juguya, walima a k'i faga. Ne balimaw, aw ye sabali ! Si te lakana sitigi yere ko.

Ne balimakew, n balimamusow aw y'a don ko fura saradalen man ni. Fura saradalen be fen caman lase mogo ma; saya ni banajuguya.

Fura saradalen be sor'an ka suguw kono; a be sor'o goferenaman ka baarakeyorow dawla, sabu a be feere jamana kono, u yere ne b'a la. N'i ye fura saradalen san, a tacogo te f'i ye, a te maracogo numan na. Ni sugu yoro o yoro sor'o fura be da yen k'a feere. Peresidan ni goferenaman ka nininkaliw te s'a ma.

Jamana nemogow, an te nogn deme walasa ka geleya ink'e ka bojamana kono. Sabu mogo minnu be fura saradalen feere, u t'a cogo don cogo si la. Olu ko wari de !

An k'an janto an yere la, bawo jantoyerela koro ko ka ni. An be don min na i ko bi, joyoro min be fura saradalen bolo, o t'an ka keneyasow bolo. Misali la, furakise do tun be yen ko «katosi», o tun te se ka ye Mali kono. Nka bi a be feere jamana fan bee fe.

Ngfan Jara
Binan Bana Merijela.

Semudete ma son ka koerisi feere ninan

Ninan, Kita mara koerisenenaw ma koerisi sor'o semudete bolo. Semudete ma son ka koerisi di, ko koerisi te yen. O kera sababu ye ka koerisene nege bomogocaman na, k'a sor'o semudete kelen don k'a feere jagokelaw ma. Senekelaw be taa koerisi san jagokelaw bolo doreme kem'e wooro. Anhakili la oyefenyem min be senekela caman degun kosebe.

Hamadi Aturu Boli
Danbana Kita

An ka dugu taamadenw ma caya ninan

N be jamana nemogow fo kosebe u ka baara nafa ser'an ka dugu ma. A tun be san caman bo an ka dugu denmisew tun be taa baara la Kodiwari jamana kan.

Nka kabini jamana nemogo ye dan sigi denmisenninw ka jamana were tagali la, an ka dugu lafiyara. Ninan taamaden si ma bo dugu dafe. N'i ye ninan taamaden ni san tow taw da nogn koro, danfaraba b'u ni nogn ce.

Cemogo Jara
Jankara - Banko - Joyila

Misijuru donni konew

Semudete nemogow ni senekelaw benn'a kan ko misijuru be don senekelaw la; o waati tun be ben mekalo ma. Mekalo selen senekelaw ye semudete nemogow nininka. Semudete nemogow k'u te misijuru don senekelaw la fo u ne ka da koori bulu kan, k'u ma d'a la ni senekelaw bena koori san sene 2001-2002 kono. O ye kuma ye semudete nemogow tun man kan ka min fo. Nin tigenna min yera semudete nemogow ni senekelaw ce, o sababu bora semudete nemogow la. N'o te kojugu bee be ke senekelaw la, an te kuma.

Dirisa Togola
Bonku - Banko - Joyila

Bagansu dunni man ni

Ne y'a kolosi, ni bagan sar'a yere ma an ka yoro la, i n'a fo sagaw n'u jirognaw, mogo d'ow be Ala mine k'o wolo b'a la, k'o dun. O ye fen ye min man ni, ka d'a kan bagan salen a yere ma, mogo si t'a don abada fen min y'a faga.

E mogo min b'o dun, o ye su kelen ye ka su dun sabu a be kasaara lase mogo ma. Nin wale jugu in be k'anw fe yan; n'a be ke yoro werew la, o tuma n'b'a jini bee fe, u k'a dabilo.

Basiru Kulubali
Sananko - Falaje - Kati

Musow joyorō sinsinna ni mériya ye Mali kono.

Kabini san 1991, marisikalo tile 26, forobafanga min ka njita ye cew ni musow ni denmisew bée sendonni yejamana baaraw bée la, ninansaraw k'o fanga ma «demokarasi», o ye yelema don Mali taariku la, bawo an balimamusow joyorō bonyara jamana kow nənaboli bée la, sira bée kan.

Kabini forobafanga damine, musow yetoncamansigisenkandemokarasi sinsinni na, nka o si m'a to an balimamusow ka bo bolokofefenza la, bawo cew b'a jir'u la sanga ni waati bée, k'u ka baara ye tobili ni denw ni duw kəlosili de ye. Fen o fen be se k'u mabo o baaraw la, sanko politikiw, u man kan ka y'o la.

An be don min na, i ko bi, o baara ka dəgo Mali kono, cew be ka minnu ke ni musow yere te k'u jeniyoro fin o la. Misali la, musow ye minisiriya soro, ka dəgotoroya baara soro, ka lakolikaramogowbaara ke, ka depiteya nigoferenereya joyorō soro; o temenen ko, u be ka foroba baara caman tiime, an da tēna se minnu bée lajelen ma. Mali musow ka timinandiya ni cesiri kadara kono, u ye fura bo cew ka woro nema ni joyorō do bəsili y'u la, u tun kelen don ka min ke «lenburuba ye k'a bisi u kelen da kono»:

O te dōwəre ye mériya ko. A san fila ye ninan ye wote minnu kera kominiw na ka mériw sugandi, muso caman y'u bolo moongo bo o joyorō nof. An ka togodaw la, mogo caman y'a faamu ko mériya te cew dōron ka baara ye. Musow y'a jira wotew senfe, k'u ni cew bée be se ka ke mériw ye kominiw na.

O misali be se ka taa Yogenogo Komini kan, n'o be Kucala serikili kono, Sikaso mara la.

N'an y'an hakili mununmunun, an b'an ye ko laada kelen don ka fen dama min kono muso ma, Mali kono k'a bila ce ko, an be kabakoya cogo min na, o jamana kelen kono, an



Salimata DANBELE

balimamusow sera k'u kogo da cewta la hadamadenya ni soro ni politiki joyoroko la.

A jirala ko hakilina in bora Yogenogo dugulenw ni nənatigew ni dugutigi n'a laadibagaw yere de la minnu ko k'a laje ka muso dōw sugandik'uk'e komini mériw ye. A ka c'a la, mogoba kofelen ninnu kan te soso Mali kono, bawo olu de ye jama hakili n'a kalamene ye. O temenen ko, laada do be Mali kono, min b'a jira ko jamaje baara kologirinbw nəmogoya man kan ka kalifa muso la, n'o te a be tijé, bawo laban te musow ka ko la. O de koso, a kəlosira ko pariti politikiw ni ton wərew kono, joyorō minnu be di musow ma, ofanba ye u yərew ka kow nənabo walew n'uka yiriwalini hadamadenya walew nəmogoya ye. Paritiw nəmogoyasow fana na, u be se ka sugandi ka ke musow ka ciden yamaruyalenw ye.

Min ye musow keli ye mériw ye, an b'an sinsin fen min ta kan o ye Madamu Mayiga Salimata DANBELE

ka mériya yoro ye Yogenogo Komini kono kabini san 1999, utikalo la. Madamu Mayiga Salimata DANBELE sugandili ju bora Famusaso dugutigi n'a ka laadibagaw de la, ka fara dugulen dōw kan.

Madamu Mayiga Salimata DANBELE tun ye «ADEMA» tonden gansan ye, min faamuyalen don senekew la, nk'a tun te baara la, waati min na jama y'a ka danaya d'a kan k'a sugandi k'a ke méri ye. An balimamuso in ye Famusaso yere wolden ye, n'o ye Yogenogo Komini faaba ye. Kucala méri musoman in bangebagaw bée ye ciklaw de ye. Madamu Mayiga yere tilala a ka kalan na Katibugu cike ni baganko kalansoba la kabini san 1996, desanburukalola. A ye baju kalan ke Kucala k'a damine san 1980 la ka t'a bilā san 1986 la.

Afurula Yusufu Mayiga ma san 1993, n'o ye Mali kōrisene ciyakədaba «CMDT» baarakela faamuyalen do ye. Denmuso 3 de b'a n'a ce bolo. N'an y'a laje ji nəmajolen na, an b'a ye ko Yogenogo Komini méri Salimata ka baara te fen nəgōn ye, bawo a yere sigilen te Famusaso n'o ye komini faaba ye. O temenen ko, gadonmuso don, min kelen don k'a ka baaraw boloda cogoya la, min b'a to, a be taa Famusaso tile naani dəgəkun kelen kono, walasa ka taa komini baaraw ke. N'a te yen, a ka dankan 3 b'a joyorō fa méri kow nənaboli la. Nka ni kobalalen cunna, u be mototigiw doci a ma a ka so, bawo mobili te komini bolo folio baara n'a nəgōnnaw kama. Madamu Mayiga Salimata DANBELE n'a baarakənōn sera ka yelema nafama jumew waleyat komini kono? A folo, u sera k'u ka baara waleyata feere sirilenw lataa jama bec jimsira fe, feere minnu tiimeli te taa waribō ko ni dugudenw n'u baarakənōn bēs

NE 9

sendonni n'u jeniyoro finni y'o baaraw la.

Komini baarakenafole kasabi be se sefawari miliyon 8 njogonna ma. Sefawari miliyon 4 taar'o la kabini san 2001, mekalo temenen k'o don Famusaso pon dilanni baaraw daf. A jirala ko méri be se ka sefawari miliyon 4 ladon san kono nisongow ni wusuruw la. Nka tuma dōw, u ni dugumogow be fo njogon kō, bawo olu kōrotolen sanga ni waati bee k'u haminanko bee waleyalen yorōnin kelen.

Hami dōw be Komini na, i n'a fo ji saniyalenko ni lakolisoko ni dogotorosoko, minnu ye fēn wajibiyal en ye. U hakili b'a la ka dogotoroso fila jo komini duguw kōno ani lakolisoko kelen Kunbiru togoda la. Ni samiyē temena, ub'a fe fana ka balikukalanso dōlaben. Madamu Mayiga Salimata DANBELE be ka musow fara njogon kan tōnw kōno, minnu be se ka nafa lase u ma faantanya kēleli hukumu kōno. Musow kakanka dege fēncamanna, osiratige la, i n'a fo safune dilanni, cikeminehw soroli ani forobacikew.

Yagonogo Komini méri Salimata DANBELE b'a fe ka ke goferenaman baarakela do ye, walasa a ka se k'i nesin politiki ma kosebe; o la a yere na se ka caman ke a ka komini ka jetaa baaraw la.

Musow ka kenyereye demetow hi tōn wērēw ka kan ka muso mēriw surunnandon, k'u lafasa u ka baaraw tiimeli konuman na demokarasi lawereli kadara kōno, walasa musow ka ye jamana joli baaraw feeresiri kenew bee kan, u ta kana ke «kun ka di kuntigi kō ye».

Dine tōnba dōw, i n'a fo min nesinnen don wotekow ma «IFES» ani lamerikenw ka demeke jekulu min ye «US-AID» ye, olu k'u ben'u ka baara fan do nesin muso mēriw lakodoni ma an ka jamana kōno kunnafonidisēbenw ni arajow ni telewison na.

B. M. SISOKO
Basiriki TURE

Musa Taraweles bolofenw mineliko



Musa Taraweles ni Mariyamu ni Duwa Abarahamu Sisoko

A tun be bee hakili la ko Musa Taraweles, a muso Mariyamu Sisoko an'a nimogōke Duwa Abarahamu Sisoko ka kiiri banna. Nka halibi taakasegin be ka ke kiiriko in kan. Bee hakili b'a la ko soro kiiri ye Musa Taraweles n'a nōfemogow nōminē. Kiribulonba y'u nōminē, k'a jira ku kelen-kelen bee ka kan ka faga; o kōfe utun ka kan ka alamani dōsara n'o be ben sefawari miliyon duuru ma. U tun ka kan fana ka sefawari miliyon kēme wolonwula ni waa saba ni kēme fila ani dōrōme bisabā ni duuru sara goferenaman ye.

Nkasan 1999 nowanburukalo la, Musa Taraweles ka awokaw y'a nini nōmineli kiiriso fe k'u b'a fe Musa Taraweles n'a nōfemogow ka bolofenw ka segin u ma i n'a fo sanu ni sow n'u njogonnaw, minnu bilala sariya ka bolo kan. Bolofen minnu tun ye forowy eolu wari tun be se sefawari miliyari kelen ni miliyon kēme ni miliyon 48 ma. Ka fara soba dōw kan, minnu wari be se sefawari miliyon kēme ni bisaba ni wolonwula ma ani sanu ni masirifētōw, minnu soro Kuluba; olu wari be se sefawari miliyon kēme naani ni miliyon biwolonwula ni saba ani baakēme ni baabiduuru ni kēme fila ni mugan ni saba ma. U ka nafolo min tun be bankiw la jamana kōkan, o tun be se sefawari miliyon kēme naani ni miliyon biwolonwula ni saba ani waa biwolonwula ni waa kelen ni kēme

duuru ni dōrōme binaani ni saba ma. Ciakēda dōw fana tum be baara ke n'u ka nafolo ye min be se sefawari miliyon bisaba ni kelen ani waa biwolonwula ni segin ani kēme duuru ni binaani ni saba ma.

Nōmineli kiiriso ye jateminē ke ka jira ko awokaw be nafolo hake min nōfe sariya yere la, obēben sefawari miliyon kēme naani ma.

A jirala k'a fo Musa Taraweles n'a nōfemogow ka bololafenw n'u ka nafolo ka kan ka segin u ma sabu kiribulonba m'a jira ko nafolo in ka kan ka mine u la. O kōson nōmineli kiiriso y'a jira ko sefawari miliyon kēme saba ni segin aniwa a kēme ni biwooro aniwa a duuru ni bisaba ni duuru ka kan ka tige nafolo in na k'a to lasegin Musa Taraweles n'a nōfemogow ma. Warimin soro Kuluba mineli kōfe n'o benna sefawari miliyon biwooro ni kelen ani waa kēme ni waa tan ni kelen ma; o fana ka kan ka fara nafolo tigeta in kan. Njunu-njunkanw tun y'a jira ko bolofen dōw tununna Kuluba ni sariyatigiw furance la. Kiiritigelaw ka kuntigi y'a jira ko bolofen minnu bilala sariya ka bolo kan, olu be yen hali sini; bee be se k'u ye.

Nin walew b'a jira ko sariya dama ka kan bee la; hali Musa Taraweles n'a nōfemogow. Nka kiiri mana tige cogo o cogo bee te jen n'a tige cogo ye.

**B. Kulubali
Badama Dukure**

«UNICEF» y'a jira ko denmisenninw janfara



Dijne seleke naanitonba min jesinnen don denmisenninw ka konew ma dijne kono, n'o ye be wele ko «UNICEF» o y'a jira ko dijne seleke naani tonba «ONU» jamanaw tun ye layidu minnu ta denmisenninw ye, olu ma tiime. «UNICEF» ye welekan bila dijne setigibaw ma.

«UNICEF» jemogoba Karoli Belami y'a jira ko denmisenninw janfara. Layidu minnu tun tara u ye, a da ser'a be ma kelen - kelen, k'a jira k'a si ma b'a sira fe. Kemesarada la, 14 boli min kera denmisenninw ka fatuli la minnu sibe sanji duuru hake la, o ye belebele bo denmisenninw ka saya la, nka yorow taw be nogo ne kosebe.

Farafinna n'i ye denmisenninw bangennen 1000 jo, i b'a soro 172 ntanyanen don olu cema. Setigijamanaw ta ye 6 doren ye dijne kono, san 2000, n'i ye denmisennin bangennen 1000 jo ib'a soro ntanyanen ye 81 ye. Ben tun ker'a kan ko do ka bo denbasaya la, konomaya ni jiginni waatiw, ka s'a tilance la; nk'o ma b'a no na. San o san denba 525.000 be sa. Sentanjamana 162 kono, n'i ye denba 62 ta, i b'a soro kelen be sa; setigijamanaw ta ye kelen ye muso 4.085 cela. Fosi ma bo nin si la, kuma te dumuniko ni kenyako, ni jiko ma.

Sentanjamana ka goferenamanw mu ka san 1995 layiduw b'u sira fe, min senfe utun y'a jira ko kemesarada la u be mugan bila kenyako ni kalanko bolow kan. U ye min bo, a te teme 12 walima 14 kan, kemesarada la, k'a sababu ke, utun ka kan ka dijne seleke naani tonbaw ka juru minnu sara. «UNICEF» ye setigijamanaw de ta fo k'a juguya kosebe. U ye deme min ke, o n'uka layiduw ce ka jan. Jamana damadow de be ka layidu b'a sira fe minu tun y'a jira ko kemesarada la, soro sira fe, ka 0,7 bo. Jamana 17 tow ma teme 0,4 kan kemesarada la. Amerikenjamana ma teme 0,1 kan.

Badama Dukure.

Dugu segin ye musow bolokoli bolokan

Sanankoro ba dugu 35, Kangaba dugu, Bananba dugu 10 kofe, Kayi dugu 8 ye musowyebolokolibolokan. Sibiridon, san 2001 okutoburukalo tile 4, Jala dugu kono, Kayi ni tilebin ce, lamini faamaw be lajelen neha, Kamankole, Jala, Same wolo fu, Darisalamu, Banzana, Jakaliya, Papaga Mediniani Papaga Kenlugala dugumogow y'a layidu ta k'u ye musomanninw bolokoli bolokan pewu.

Nin layidu in ma ta gansan. Demeliton min jesinnen don laadalakow ma n'o ye «AMSURT» ye, o ye san naani ke ka dugumogow ladonniya musow ka bolokoli kolo la. O kera sababu ye dugumogow ka hakili sooro.

Akera sababu ye dugumogow ka fara duguw jemogow kan ka jemajeba do ke Jala dugu kono.

«AMSURT» jemogoba Madamu Sidibe Kadja Awudu y'a jira k'olu ka lajinitun ye dugumogow k'a don u yere ma, ko musow ka bolokoli be baasi caman lase npogotigininw ma.

Ak'ale nisondiyalen don bi k'a sababu ke musow ye faamuyali k'u yere ma. A k'a nisondiyalen be faransikaw ladonniya ko bolokoli in dabilala ni musow yere ka deme ye. Bees b'a don komusow bolokoli konnen don sariya fe Faransi jamana kan.

«AMSURT» ka baara te bolokoli konni n'a keleli doren ye. A ye poroze misennin caman sigi, walasa ka dugumogow deme, kerenkerennenya la musow.

O. Nani
Badama Dukure.

Hadamadenyatōn n'a daniyaw

Hadamadenyatōn, n'a bē wele nansara kan na «Nuweman Imanisiti», ye mogo hakilimaw faralen ye nōgōn kan ni Laniya kelen ye, min nesinnen don danfarali kéléli ma mogow ni nōgōn ce.

Hadamadenyatōn bē dijē jamana biwooro ni kō kōno, Ero u, Azi, Afiriki ani AMerikyanfanw na. A b'a fe ka hadamadenya bila sira tilennen kan, walasa ka nōgondégun kélé.

Mogo min ye hadamadenyatōn sigili hakilina soro, o ye Mariwo, Luwisi Orodigesi Kōlōsi ye, n'a bē wele a jōgōnw fe ko Silo. Ton in bangera san 1968 waatiw la Arizantinijamana kōno.

Bamananmarifa bē ka tunun

Ne ye ko dō kōlōsi; n'an m'an cogo dōn o ko in natō la, a bē ke gelyaba y'an bolo don dō. O ye mun ye ? Ne y'a kōlōsi, bamananmarifa bē ka tunun an fe yan dōcōn-dōcōn.

N'i y'a lajé, anw yere bē se k'an ka bamananmarifaw dilan, ka tila ka marifamugu dilan an yere ye, k'an yere lakana, ka sogow faga kungo kōno. Nka bi bamananmarifa bē ka dōgoya kosebē.

Min ye tubabumarifa ye, tubabuw b'o dilank'o feer'an ma; ubē marifikisew dilan k'olu fana feer'an ma. Ala k'an kisi, don min na n'olu ye marifikis feereli tig'an na, marifaw bē ke jirikuurunw y'an bolo. O bē ke cogo di ? A bē ke gelyaba y'an bolo.

O tuma, an kana nūn bamananmarifaw kō; an'an ka tama kōrō. An k'u dilan k'u mar'an kōrō. Tubabuw bē k'an nōgōn - nōcōp nōgōn k'an ka fēn wōcōk bē silatunutun, ka wuli an kama.

**Basiru Kulubali
Samanko Falaje Katı**

Hadamadenyatōn ye demetōn ye, nk'a te deme k'i n'a fo tōw b'a ke cogo min na. A bē mogow deme, minnu jéra k'u naniya ke kelen ye nētaa sira kan. A te wari di mogow ma ten. A b'a fe dugumogow, sigidamogow ka fara nōgōn kan ka nētaa baaraw boloda, k'u seko ke, sabu a ka nsana dō b'a fo ko : «Sann'i ka mogow dege jēge dunni na, i ka kan k'a dege jēge mineli la». A te mogow kelen deme; a ka deme nesinnen don mogow kafolenw ma, walasa k'u deme k'u kunkow jēnabo. Hadamadenyatōn ka wari soro sirlen te dijē nafolobatigiw la. A ka wari bē bōtōnēn w kūn. Okoson, ni mogow min donna ton in na, i bē dōrōme 240 sara kalo kalo o kalo crēow o kalo.

O wariw bē fara nōgōn kan ka mogow degunnenw deme. Hadamadenya te mogow bō mogow la; a te dijē bō dijē na; a te siya bō saiya la. A te kélé fe; a te diyagoya walew fe.

Amidu Kulubali BP. 208 Bamako

San 2001,
setanburukalo tile 11
binkanni walew kera
mogo 5.465 sata ye.

Niwiyōrikiyajira, in'a fōpolisiw y'a fo cogo min na ko amerikenw ka yōrōba cili kera mogo 4.815 sata ye.

Su 417 soro soro cilenjukōrō, soba ninnu cili senfe, min kera setanburukalo tile 11, san 2001.

Su 366 lakodonna, méri ka fo la.

Jaabi minnu bōra okutoburukalo tile 13, olu y'a jira ko mogo 4.979 silatununna, su 393 soro bugurimugu jukōrō. Mogo minnu tora Niwiyōriki, Pentagoni, ani Pennisiliwani sobaw cili la, olu hake sera 5.465 ma. Pentagoni yōrōba cili senfe, mogo 189 sara, nk'u ma fadodon; olu la mogo 125 tun bē baara ke yōrōba in na; mogo 64 tun bē amerikenw ka pankurun kōno.

Mogo 44 sara Pennisiliwani. Jamana minnu mogo tun b'a la, olu hake tun bē se jamana 60 ma.

Badama Dukure

TULON

Nin desen fila dilanbagā y'a dab'a kama ka fili 10 k'u la. A'y'olu nini.



Jaabi

1) - Filiritu dō kōrōla. 2) - Samaraw jukōrōla. 3) - Soba min be nūman fe. 4) - Jilien binneen ja. 5) - Kulusi. 6) - Cenin nūmante tegé. 7) - Bondia min be nūman fe. 8) - Kurnauji min be nētei la. 9) - Panakrun min be nāntela la. 10) - Jiri min be kinin fe.

Hakilijagabo

Nininkaliw :

1°) Cikela mana koro cogo o cogo a b'a ka denmisen son bee bila fo son kelen.

O ye son jumen de ye ?

2°) Nin kera sotigi fila ye; u bee n'u ka so. K'u ka boli ka bo Bamako suguba la ka taa kibaru bugufiye la. Ni so min folo sera, o te ladiyalifen sor. So min mana to ko, o de be ladiyalifen in sor.

Nininkali: Cogo jumen de be ke walasa so ninnu ka dakabana boli ke ?

Nininkali: Dajé sure kelen be nin kulu

saba in bee kelen kelen na. A' yé dajé sure in labo kulu in kelen kelen na.

a) Kulu folo: Wulu, sulu, dijé kalanso, buguso, junu

b) Kulu filanan : Gafe, kibaruseben, sigareti, diden, kaye.

c) Kulu sabanan : Di, taji, fooco, nono, kalan, neji sanji.

Jaabiw :

1°) Cikela te denmisen son kelen min bila, o ye to sira fileli de ye. Ni todun waati sera cikela bee be to k'u kun wuli

k'a laje ni to be ka na.

2) Walasa sow ka dakabana boli ke, an be sow falen. O mana ke bee b'i ka so kura dasi kosebe, walasa o na ke folo ye.

3°) a) Kulu folo la dajé sure ye Wulu ye, sabu fen be don ka mara tow bee kono fo ale kelen.

b) Kulu filanan na, dajé sure ye diden ye, sabu sebenfura be sor. tow bee la fo ale kelen.

c) Kulu sabanan na, dajé sure ye kalan ye, sabu ji be sor. tow bee la fo ale kelen.

Burama Sidibe ka bo Sirakorola
Kulukoro

Poyi : Cikela

i ni segen !

i ni muju !

i ni tooro !

jon ko cikela te fen ye ?

Fajiri yoribaa,
tilenfarinbaw jatigi,
kungo kono kunguruninf,
sabaw daato,
binjuguw halakibaa
fitiridafa waraba,
dugutilama kono.

An ka paritiw yelema-yelema fanga la, i ko an be
sumanw yelema - yelema cogo min na foro kono.

Cikela bee b'a don ko n'i ye suman kelen senne foro kelen kono sancaman ka da nogn kan, suman sorota laban be dogoya ka t'a fe. O sababu ye fen damadow ye, i n'a fo:

- sumanw diliw b'u ka dumuni jini yoro kelen na san o san.

- Bin suguya kelen de be to ka bo foro in kono san o san.

- Tijenif kelenw de be to ka bo foro in kono san o san.

- Tijenif kelenw be deli furajiw la, minnu be ke ka suman in fura ke.

- Sen (k'a ta danni na fo ka se tigeli ma) suguya kelen de be ke suman in na.

- Dugukolo nogo be dogoya, k'a yugubali caya.

Foroko be cogo min na, paritiko fana b'o cogo kelen na, n'o ye politikitonko

e kera sinbon ye :

i be don sufe

ka bo o su kelen fe.

E kera bulondala farakolofin ye :

tile mago t'i la,

sanji mago t'i la,

jango finge gansan.

I ni segen !

I ni muju !

i ni tooro !

jon ko cikela te fen ye ?

dabakala matarafabaga,
dunkafa sabatibaga;

ye. Ton kelen fana mana san caman ke jamana kelen kunna, o jamana in te yiriwa k'o sababu ke ko damadow ye, minnu file:

- Ton nemogow be nin layidu talenw ko; dow be yaada; dow be nin'ujion ko.

- Tondenw te siran foyi ne; caman te fanga bonya tugun.

Mali tonjemaaw, an k'a laje ka fanga yelema-yelema tonwni nogn ce in'a fo suman be yelema-yelema foro kono cogo min na. Ton dow k'u segenafinebo i n'a fo cikela be dugukolo hine lasegin san damado kono cogo min na.

Mali jamana te ton kelen niyoro ye; walasa ka jamana layiriwa, fo tonw ka nogn falen-falen fanga kunda.

Burama Sidibe
Sirakorola «CAR» la.

yiriwali josen folo,

Nkan be e cikela de ma.

E min be juguw kele,

E min be hadamadenya sankorota,
Miiriya were te min na faso ka netaa ko.

E kera dugucema jirisunba ye

Ka jo bee jigi koro.

i ni timinandiya !

i kana salaya de!,

bawo dugukolo te mogo negen.

i ni foli ka kan, sabu cikela te yoro min,

A bolo fen te yen, balo t'o yoro la.

Balo dun te yoro min,
here te yen.

Manbi Sama Tunkara
Nansaarakalanden ka bo
Segafina, Kita mara la

"AMAP" kuntigi

Gawusu DAFABO

Mali kanw kunnafonis seben

baarada kuntigi

Nenze Samake

Kibaru

BP .24 Telefon: 21-21-04

Kibaru Bugufiye Bozola

Bamako - Mali

Dilanbagaw ni sebenbagaw kuntigi

Basiriki Ture

Sebenbagaw kuntigi

Badama Dukure

Labugunyer Kibaru gatedilar baarada

Bolen Hake: 10.000